

JOUVERT MORNING SPECTACULO GRANDIOSO



ORANJESTAD (AAN): Diasabra madrugá **Jouvert Morning** a resulta den un di e espectacularonan di e popularmente yama "**Pijama Parade**" mas grandi di su

historica cu participacion di 9 banda musical y cu participacion activo di hende bailando tras di e bandanan cu a yega na surpasa 8 mil

entre Caya Grandi y Lagoweg.

Na varios punto di e parada, esta salida, caya grandi, Lagoweg y na final, **DIARIO** a haci "**conteo especulativo**" y por a nota cu saliendo di caya grandi dreitando den Lagoweg, e conteo tabata calculacion di poco mas di 8 mil persona bailando tras di e bandanan musical.

E fiesta di madrugá a cuminsa verdaderamente cu e introduccion di cerveza Bavaria dilanti Las Vegas

Bar entre 8 or y 12 or anochi diabierna anochi.

Y aki mester menciona cu e organizadoman di JU.BU. a kibra tur record, no solamente di asistencia pero tambe di venta di cerveza e aña aki.

Na dado momento a invita e publico pa bay sigui e fiesta publico den Grensweg unda Coastal tambe a tene su actividad callejera.

Despues di esey tur hende a baha pa cayanan di parada di Jouvert Morning.

Masha hopi turista por a mira riba caya e madrugá aki, y e hulandesnan tabata na cantidadnan hopi grandi entre nan.

Den e jump up di Jouvert Morning por a mira turistanan di tur nacionalidad, y di tur edad bailando mey mey di e localnan for di principio te fin gosando un mundo di e libertad di baile y gozo di carnaval di Aruba.

Un di e partinan mas dushi

di e actividad aki ta e ora prome cu su comienzo, pa gana den caya grandi (midi caya manera ta ser bisa) goza di e ambiente reinante, pasa bay te San Nicolas Sport Park y aki cana mey mey di e bandanan cu ta haciendo nan preparacion y cumpra pasaboca of beida na un di e tanto standnan (prome y despues di parada) y sali hunto cu e bandanan den e jump up.

Bandanan cu sigur a impacta e madrugá aki tabata Quasi, Oreó, Original Band, Control, Eclipse, y Taxx cu tabata esnan cu a logra mas tanto hende nan tras durante e parada aki cu a wordo masha elogia e aña aki.

Sinembargo e elogio di mas grandi mester bayna e bandanan musical y nan musiconan cu a dicidi di coopera y participa haciendo e Jouvert Morning un di e eventonan mas agradables di publico e aña aki.